

HERMANUS SE SSB-VERLIGTINGSPAD WORD 'N REALITEIT

Verbeterde mobiliteit en veiligheidsvlakke grootste voordele

Na verwagting gaan bouwerk aan Hermanus se SSB-verligtingspad op Maandag 17 Augustus 'n aanvang neem, en 14 maande later sal die dorp se paaisisteem met verbeterde mobiliteit en veiligheid kan spog. Uiteindelik sal die hart van die wêreld se Walvishoofstad baie meer voetganger-vriendelik wees, wat die SSB sal laat herleef en ekonomiese ontwikkeling 'n hupstootjie gaan gee.

By die ter perse gaan, was die evaluering van tenders nog nie afgehandel nie, maar daar word verwag dat die projek se konstruksiekoste soveel as R20 miljoen plus gaan beloop. Die aankoop van eiendom vir die herbelyning van die pad, het R8 miljoen beloop maar sommige van die huise gaan behou word om in die munisipaliteit se dringende behoefte aan kantoorruimte te voorsien. Hierby is R2 miljoen aan beplanning en ontwerpgele bestee.

Die projek gaan in drie fases aangepak

word om verkeersvloei so min moontlik te ontwrig, veral gedurende die piekvakansiesoos in Desember en die 2010-sokkerwêreldbekertoernooi. Sien die kaarte hieronder vir meer inligting in hierdie verband.

Dit bring die planne tot uitvoer wat in 1990 'n aanvang geneem het toe daar tot die besef gekom is dat Hermanus as die primêre burgerlike, administratiewe en toerismesentrum vir die streek funksioneer en dat daar 'n gestadige groei in die volume van plaaslike en deurgangverkeer is. Probleme ten opsigte van mobiliteit, toegang tot sakeondernemings en toerismeaanreklighede, voetganger- en verkeersveiligheidsvlakke en beperkings op sakegroei in die SSB moes onder die loep geneem word.

'n Voorlopige ontwerp is in 1994 opgetrek en het openbare steun geniet by vergaderings wat in Desember 1996 en Mei 1997 gehou is. Die Hermanus-vervoerplan, wat in 1997


opgestel is, het die behoefte aan 'n SSB-verligtingspad bevestig en vier alternatiewe roetes oorweeg. Daar is bevind dat die oorspronklike voorstel, om herbelyning langs Spencestraat, Royalstraat en Lord Roberts te volg, die een is wat die beste aan die doelwitte vir 'n verligtingspad voldoen, waaronder die minimalisering van koste vir belastingbetalers.

Hierdie belyning is gemodifiseer ten einde grondverbruik te verlaag en om voorsiening te maak vir verhoogde ontwikkelingspotensiaal vir die stasieterrrein, verlaging van die nyspoed op die verligtingspad, wat operasionele toestande veiliger vir voetgangers en fietsryers maak, en verbetering van die sigafstande by sekere interseksies.

Verlede jaar het 'n ekonomiese haalbaarheidstudie, uitgevoer in opdrag van die munisipaliteit, bevind dat voertuigbedryfskoste en die waarskynlikheid van ongelukke

op die SSB-pad danksy die opgradering sal afneem. Die studie het die netto persentasiewaarde van verbruikersvoordele op R144 miljoen oor 'n tydperk van 20 jaar beraam. Die verhouding van voordeel tot koste is as 7,84 bereken, wat as baie goed beskou word aangesien 'n verhouding van meer as 1 as ekonomies haalbaar beskou word. Gevolglik is daar aanbeveel dat die projek so gou as moontlik geïmplementeer moet word.

In breë terme behels die projek die herbouing en verbreding van Spence-, Royal- en Lord Robertsstraat, herbelyning van seksies van die roete, oprigting van verkeerskruisings as kalmeringsmaatreëls, uitoefening van toegangbeheer deur direkte toegang vanuit verskeie strate af te sluit en opgradering van toegang vanuit strate wat wel die roete kruis, met voorkeur aan gebruikers van die verligtingspad.



OVERSTRAND BULLETIN

DRASTIESE BOBBEJAANBEHEER-MAATREËLS OORWEEG

Alhoewel Munisipaliteit Overstrand die toonaangewende munisipaliteit in die Wes-Kaap is sover dit die bestuur van die bobbejaanprobleem betref, word nuwe weë om langtermyn-oplossings te vind tans ondersoek. Volgens Uitvoerende Burgemeester Theo Beylerveldt kan dit dalk verreikende metodes soos geboortebepierking en die vermindering van getalle op 'n menslike manier insluit. Die elektriese heining in die Voëlkliip-area wat onlangs uitgetoets is, het homself bewys en sal gedurende hierdie finansiële jaar uitgebrei word. Dit het gevolg op 'n werksessie wat vroeg in Julie deur bobbejaan-kenners in Kaapstad gehou is waar Munisipaliteit Overstrand aangeprys is vir sy pogings en tegelyk wetenskaplike steun vir sy sienswyse ontvang het, naamlik dat bobbejane uit woongebiede gehou moet word en in die berge tuis behoort. Navorsers het die konferensie meegedeel dat bobbejaan-troppe wat in residensiële gebiede woon en wei min ekologiese waarde het en ongehoorde toenames in hul populasie ervaar. In die natuur is die drakapasiteit-verhouding een bobbejaan per 1,5 vierkante kilometer, en in 'n stedelike omgewing skiet dit op na 14 bobbejane per 1,5 vierkante kilometer. Die gemiddelde ouderdom van bobbejane in stedelike troppe is ook baie hoër as dié van

bobbejane in 'n natuurlike omgewing.

MELD BOBBEJAANVOORVALLE OP MUNISIPALE WEBWERF AAN

Munisipaliteit Overstrand ondersoek tans hoe sy webwerf gebruik kan word om inligting te bekom vir die bestuur van bobbejane in woongebiede. Daar is reeds 'n ruimte waar bobbejaanvoorvalle aangemeld en gesprekke gevoer kan word. 'n Gebruikers-vriendelike vraelys wat aan 'n databasis gekoppel is word tans ontwikkel. Diegene wat daarin belangstel om deel te neem, kan as gebruikers van die Gemeenskapsforum registreer by www.overstrand.gov.za. Toegang tot die Gemeenskapsforum kan verkry word deur middel van 'n skakel bo-aan die hoofbladsy of navigeer via <http://forum.overstrand.gov.za>. Die Gemeenskapsforum kan ook vir ander algemene besprekings rakende die munisipaliteit asook die Overstrand-gemeenskap gebruik word.

BLOMPARK KRY HUL EIE GEMEENSKAPSAAL

Die Blomparkgemeenskapsaal op Gansbaai is in Junie geïnisieer in gebruik geneem en

MORELESTANDAARDEINISIATIEF: N' 5 REGVERDIGHEID

Die Groter-Hermanus Morelestandaarde-inisiatief (MSI) het ten doel om 'n waardegedrewe gemeenskap gestruktureer rondom ses kernwaardes of -standaarde te bou. Tot dusver is reeds op drie van die ses kernwaardes gefokus, te wete:

- Betroubaarheid:** 'n Gemeenskap waar mense met eerlikheid en integriteit optree, hul woord gestand doen en nie mislei of bedrieg nie.
- Respek:** 'n Gemeenskap waar mense as unieke individue erken en waardeer word en beskaafde en verdraagsaam teenoor mekaar optree.
- Verantwoordelike:** 'n Gemeenskap waar mense 'n pligsbesef het, positief dink en gewillig is om verantwoordelike te neem en te deel en betrokke te raak.

Die vierde waarde waarop ons in hierdie maand fokus, is **Regverdigheid**. Dit sal in September en Oktober gevolg word deur die waardes van **Omgee** en **Goeie Burgerskap**.

REGVERDIGHEID is 'n kernwaarde en batese onderbou van 'n werklik demokratiese gemeenskap en die konstitusionele bestel en regstelsel van so 'n gemeenskap. Dit is ook ten diepste gewortel in die verskeidenheid godsdienslike oortuigings in elke gemeenskap.

Die waarde van regverdigheid kom veral tot uiting wanneer ons in ons optrede gelei word deur die beginsel om altyd op te tree teenoor ander soos wat ons verwag ander teenoor ons moet optree.

Regverdigheid in ons optrede vereis dat ons altyd 'n oop gemoed in alle situasies behou sodat ons so objektief en onpartydig as moontlik, gegrond op alle relevante feite en oorwegings, kan optree. Dit verg ook dat ons daarna streef om mense se reg tot gelyke behandeling in alle omstandighede te respekteer.

Dit is nodig dat ons almal in hierdie gemeenskap, waarvan ons die voorreg het om deel te wees, onself altyd toets aan 'n paar belangrike vrae:

- Doen ons almal as individue, as owerhede, as sakeondernemings, as kerke genoeg om 'n kultuur van regverdigheid in ons gemeenskap te vestig?
- Trees ons regverdig op teenoor diene wat vir ons werk in ons besighede en in ons huise?
- Is ons altyd regverdig wanneer ons kritiseer en kla? Maak ons seker dat ons al die feite het en ons kritiek billik is?
- Trees ons altyd regverdig op teenoor dié aan wie ons 'n diens lewer?
- Enige kommentaar rakende die Morelestandaarde-inisiatief kan met vrymoedigheid per e-pos gerig word aan ermses@vodamail.co.za of per SMS aan 082 412 4538 / 082 470 3975.

DO YOU PREFER THIS NEWSLETTER IN ANOTHER OFFICIAL LANGUAGE?
SMS your account number with E for English to 082 338 1631 or contact your nearest client service officer.

UNGATHANDA LENCWADI YESAZISO-NDABA IBHALWE NGOLUNYE ULWIMI?
Thumela i-SMS enenombolo ye-akhawunti yakho kunye no X omele isi Xhosa kule nombolo 082 338 1631

AUGUSTUS 2009

'N KORT OORSIG



gaan voortaan 'n belangrike rol in die lewe en ontwikkeling van die buurt se mense speel. Die gebou wat teen 'n bedrag van R1,2 miljoen opgerig is, is toegerus met klanktoerusting, 'n verhoog, gordyne en 'n projektor waarmee filmvertonings en bewusmakingsprojekte aan die gehoor aangebied kan word. Enige funksie of vergadering kan hier teen baie billike huurartiewe aangebied word. Die bouwerk het in die laaste week van Januarie 2009 'n aanvang geneem, en minstens 20 plaaslike vakmanne van Blompark en Masakhane was oor 'n tydperk van drie maande by die projek werksaam. Dit verteenwoordig ongeveer 1 500 mensdae of 12 000 mensure. Bykans alle materiaal is plaaslik aangekoop. Die projek is departementeel deur die areabestuurder en bou-inspekteur van Gansbaai bestuur en binne drie maande volgens program voltooi. Die klinkersteen-gebou is bykans 310 m² groot en die totale oprigtingskoste is bereken op R3 900/m² wat aansienlik laer is

as wat die standaard-boukoste beloop wat in die bedryf ervaar word. Die gebou kan ongeveer 200 persone huisves en kantore is voorsien aan die Blompark-inwonersvereniging en die Ikhamva-jeugvereniging, wat ook verantwoordelik is vir toesighouding en aangaklike skoonmaak van die saal en die terrein.

OVERSTRANDER BESTE STUDENT IN BRANDWEERWETENSKAP

Munisipaliteit Overstrand se brandbestryder wat in Kleinmond gestasioneer is, Marlu Rust (heel links), het onlangs ten tye van die Suid-Afrikaanse Instituut vir Nooddiens (SAESI) se konferensie in Johannesburg 'n toekenning ontvang as 2008 se Beste Student in Brandweertegnologie. Marlu het sy Hoër Diplomakursus in 2008 voltooi en het ook in 2007 die toekenning vir die Beste Student in Brandweertegnologie ontvang.



WÊRELDOMGEWINGSKALENDER: N' 5 NASIONALE BOOMPLANTDAG 1-7 September 2009

Nasionale Boomplantdag word reeds sedert 1983 in Suid-Afrika gevier. Bome vervul 'n allerbelangrike rol in ons samelewing as bronne van boumateriaal, voedsel en medisyne asook weens hul natuurskoon. In 1999 het die nasionale regering versoek dat Nasionale Boomplantdag verleng word na Boomplantweek wat vanaf 1 tot 7 September elke jaar duur. Organisasies, sakeondernemings en skole word aangemoedig om die gemeenskap te "vergroen" gedurende hierdie week.

Die boom van die jaar is die Apiesdoring (*Acacia galpinii*) [Tshikwalo (Tshivenda), Monkey Thorn (Engels), Molopa (Noord-Sotho)].

Dit is vernoem na Ernest Galpin, 'n bankbestuurder wat in die vroeë 20ste eeu plante in Barberton versamel het. Dit is 'n bladwisselende boom wat vinnig groei en hoogtes van tot 30m kan bereik. Gedurende die groeiseisoen kom ligte geel blomme voor wat gedurende Februarie-Maart as rooierige peule ryp word. Apies hou daarvan om in dié boom se wye takke te skuil en eet ook die peule en sade, vandaar die gewone naam. Sade word ook versprei deur diere wat die peule vreet. Die ligte bruin, growwe grein, swaar en redelik harde hout is besonder moeilik verwerkbaar maar kan in swaar konstruksiewerk, binnenshuise versiering en as brandhout gebruik word.

In Suid-Afrika is *Acacia galpinii* se natuurlike habitat Limpopo en die

Noordwes-provinsie. Dit word beskou as 'n aanwyser van soetveld, wat sy voedingswaarde gedurende die winter behou. Dit kom gewoonlik naby water voor en groei veral goed in diep, klam maar goedgedreineerde leemagtige grond. Alhoewel die boom van die jaar nie in die Overstrand-streek groei nie, is daar verskeie ander inheemse bome wat goed hier aard. Moontlikhede, om maar 'n paar te noem, sluit in:

- Wildeperske (*Kiggelaria africana*)
- Kaapse boekenhout (*Rapanea melanophloeos*)
- Rooiels (*Cunonia capensis*)
- Wildepruim (*Harpephyllum caffrum*) (nie inheems in die Suidwes-Kaap nie)
- Karee (*Rhus lancea*)

Om meer besonderhede te bekom, kontak asseblief vir Willemien Swanepoel by 028 813 8100.



NASIONALE BEDROG BLITSLYN
0800 701 701

UITVOERENDE BURGEMEESTER EN KOMITEE

Ingevolge die Derde Wysiging van die Munisipaliteit Overstrand se Instellingskennisgewing van 28 Mei 2003 is Overstrand 'n munisipaliteit met 'n burgemeesters-uitvoerende stelsel wat met 'n wyksdeelnemende stelsel gekombineer is.

Die raad kies by sy inhuldigingsvergadering 'n uitvoerende burgemeester en 'n uitvoerende onderburgemeester

Wetgewing laat toe dat die Uitvoerende Burgemeester van Overstrand 'n komitee van drie lede in Overstrand kan aanwys, waarvan een die Onderburgemeester is. Elkeen van hulle staan aan die hoof van 'n portefeuljekomitee, waarop lede van al die politieke partye in die raad dien. In Overstrand kom die portefeuljekomitees ooreen met die administratiewe direkteorate, naamlik Gemeenskap- en Beskermingsdienste; Infrastruktuur, Beplanning en Ekonomiese Ontwikkeling; en Finansies en Bestuursdienste.

Die Uitvoerende Burgemeester, die lede van die Burgemeesterskomitee en die Speaker is voltydse raadslede.



Uitvoerende Burgemeester Rdl Theo Beyleveldt

By wyse van 'n raadsbesluit is alle bevoegdhede wat nie ingevolge wetgewing vir 'n volle raad gereserveer is of aan 'n amptenaar gedelegeer is nie, aan die Uitvoerende Burgemeester gedelegeer. In die besluitnemingsproses ontvang hy verslae van die raad se komitees wat gewoonlik deur hom by 'n vergadering van die Burgemeesterskomitee in die openbaar oorweeg word. Hy speel ook 'n leidende rol in die opstel en implementering van die Geïntegreerde Ontwikkelingsplan, die Munisipale Begroting, die Dienslewering- en Begrotingsimplementeringsplan, prestasiebestuur, gemeenskapsdeelneming aan raadsaangeleenthede en korporatiewe kommunikasie en vervul boonop ook 'n seremoniële rol. Hy doen verslag aan die raad oor sy besluite.

Uitvoerende Onderburgemeester en Burgemeesterskomiteelid vir Korporatiewe en Gemeenskapsdienste



Rhr Verrell Herbert

Benewens sy pligte as onderburgemeester, sien die lid om na:

- Areabestuur en operasionele dienste in Hermanus, Gansbaai, Stanford en Hangklip-Kleinmond;
- Behuising;
- Korporatiewe Projekte; en
- Beskermingsdienste, wat bestaan uit Brandweer en Rampbestuur; Verkeer en Lisensies; en Wetstoepassing en Sekuriteit.

Burgemeesterskomiteelid vir Infrastruktuur, Beplanning en Ekonomiese Ontwikkeling



Dié lid se verantwoordelikhede sluit in:

- Infrastruktuur, Beplanning en Elektrotegniese dienste, wat bestaan uit: Waterdienste en Vervoerstelsels; Elektrotegniese Dienste; Projekbestuur en Ontwikkelingsbeheer; Dorpsbeplanning en Eiensomsadministrasie; Boubeheerdienste; Omgewingsbestuursdienste; en Geografiese Inligtingsdienste; en
- Plaaslike Ekonomiese Ontwikkeling, waarby ingesluit is die Bestemmingsbemarkingorganisasie (Whale Coast Marketing) en Overstrand Ekonomiese Ontwikkelingsagentskap (OLEDA).

Burgemeesterskomiteelid vir Finansies en Bestuursdienste

Rdl Ben Solomon

Dié lid is verantwoordelik vir:

- Finansies, wat die volgende behels: Bestuur van Uitgawes en Bates; Inkomste; Rekenkundige en Begrotingsdienste; Voorsieningskanaalbestuur; en Stelsels en Databeheer; en
- Bestuursdienste, wat insluit: Menslike Hulpbronne; Strategiese Dienste; Inligting- en Kommunikasietegnologie; Regsdienste; Korporatiewe Kommunikasiediens; Raadsondersteuning, Rekords en Argiewe; en Interne Ouditdienste.



DIE RAAD

SPEAKER Coetsee, Anton (DA)



WYK 1 Tutu, Violet (NPP)



WYK 2 Scholtz, Pieter (DA)



WYK 3 Berry, Allan (DA)



WYK 4 Marais, Francois (DA)



WYK 5 Tshandu, Mvuyiseko (ANC)



WYK 6 Khohlakala, Funeka (ANC)



WYK 7 Solomon, Ben (DA)



WYK 8 Gelderblom, Jan (ANC)



WYK 9 Appelgrein, Phillipus (DA)



WYK 10 Van Heerden, Louis (DA)



PV DA Beyleveldt, Theo



PV DA Herbert, Verrell (Rhr)



PV DA Oosthuizen, Daan



PV DA Kriel, Johan



PV ANC Smuts, Willie (Rhr)



PV ANC Ponoane, Makhaya Vuyisile




PV ANC Stevens, Dawn



PV NPP Opperman, Moira



OVERSTRAND EN SY WYKE



Die munisipale gebied van Overstrand beslaan 'n oppervlak van ongeveer 2125 vk km. Die gebied het 'n geskatte permanente bevolking van meer as 90 000. Die munisipaliteit se hoofkantoor is op Hermanus, maar dienslewering word gedentraliseer uit kantore op Gansbaai, Stanford, Hermanus, Zwelihle, Kleinmond en Bettysbaai bedryf. Die gebied is in vier administrasies verdeel: Hangklip-Kleinmond, Groter Hermanus, Stanford en Gansbaai.

Verder is die gebied in 10 wylde verdeel, elk met 'n direk verkose raadslid. Die raadslid word deur 'n wykskomitee van 10 lede bygestaan. Die wykskomiteelede word op 'n demokratiese grondslag verkies. Voorsiening word gemaak vir die verteenwoordiging van organisasies sowel as individue in wykskomitees. Wykskomitees speel 'n belangrike rol in die opstel en hersiening van die munisipale GOP en die identifisering van begrotingsbehoefes.

Overstrand se wylde is soos volg:

1. Kleinbaai, Franskraal, Blompark, Masekhane en 'n gedeelte van Gansbaai;
2. Die res van Gansbaai, De Kelders, Pearly Beach, Baardskeerdersbos, Viljoenshof en Withoogte;
3. Stanford en Voëlklip;
4. Hermanus en Mount Pleasant;
5. 'n Gedeelte van Zwelihle;
6. Die res van Zwelihle;
7. Sandbaai, Onrus, Vermont en Ertjiesvlei;
8. Hawston en Fisherhaven;
9. Kleinmond, Proteadorp, Overhills, Höningklip; en
10. Palmiet, Bettysbaai, Pringlebaai en Rooiels.

Nege van die 19 raadslede verteenwoordig politieke partye op 'n proporsionele grondslag. Dit beteken dat inwoners ook politieke kanale kan gebruik om sake onder die raad se aandag te bring. Drie partye word in die raad verteenwoordig: die Demokratiese Alliansie, die ANC en die National People's Party (NPP).

DIE ADMINISTRASIE



Munisipale Bestuurder Mnr Werner Zybrands

'n Munisipale Bestuurder word deur die Raad aangestel. Hy is die skakel tussen die raad en die administrasie, waarvan hy die hoof is, en dien ook as rekenpligtige beampste wat moet verantwoording doen van die munisipaliteit se inkomste en uitgawes, bates en ander verantwoordelikhede, asook die behoorlike nakoming van die Wet op die Bestuur van Munisipale Finansies. Kragtens wetgewing moet hy oor die kundigheid en ondervinding beskik om sy pligte te kan uitvoer. Onderworpe aan die beleidsriglyne van die munisipaliteit sien hy onder meer toe dat 'n ekonomiese, effektiewe, doeltreffende en verantwoordbare administrasie gevestig en ontwikkel word, dat die GOP gestalte kry, dat munisipale dienste op 'n volhoubare en ewewigige manier gelewer word, dat 'n personeelkorps aangestel, bestuur, ontwikkel en gedissiplineer word en dat gesonde arbeidsverhoudinge gehandhaaf word. Hy moet deelname van die gemeenskap fasiliteer en 'n stelsel ontwikkel waardeur gemeenskapstevredenheid met munisipale dienste bepaal kan word.

In Overstrand se geval word mnr Zybrands hierin bygestaan deur 'n span direkteure vir die volgende:

- Finansies: Mnr Henk Kleinloog;
- Bestuursdienste: Mnr Coenie Groenewald;
- Gemeenskapsdienste: Mnr Roderick Williams;
- Beskermingsdienste: Mnr Neville Michaels;
- Infrastruktuur, Beplanning en Elektrotegniese Dienste: Mnr Stephen Muller; en
- Ekonomiese Ontwikkeling: Mnr Solomzi Madikane.